



Број/Број: **01/2а-50-1-2-67/10**

Сарајево/Sarajevo: 15.6.2010.

ZAPISNIK

67. sjednice Komisije za vanjske poslove Predstavničkog doma Parlamentarne skupštine BiH, održane 15.6.2010.

Sjednica Komisije počela je u 14 sati.

Prisustvovali su: Slavko Matić, Milorad Živković, Husein Nanić, Lejla Klokić i Denis Bećirović.

Odsustvovali su: Milica Marković, Azra Hadžiahmetović, Azra Alajbegović i Sefer Halilović.

Osim članova Komisije, sjednici su prisustvovali: Senad Bužimkić i Elma Bašić iz Ministarstva vanjskih poslova BiH, Majda Duranović iz Ministarstva civilnih poslova BiH, Samir Rizvo iz Ministarstva sigurnosti BiH, Muhamed Smajić iz Ministarstva odbrane BiH, Bejta Ramović iz Ministarstva finansija i trezora BiH i Brankica Pandurević iz Ministarstva vanjske trgovine i ekonomskih odnosa BiH.

Sjednicom je predsjedavao Slavko Matić. On je pozdravio prisutne i otvorio raspravu o dnevnom redu 67. sjednice Komisije.

Milorad Živković pitao je da li je u vezi s inicijativom Momčila Novakovića sada riječ o nekoj drugoj raspravi, s obzirom da je za njegovu inicijativu već dato mišljenje.

Slavko Matić kazao je da je inicijativa na dnevnom redu radi davanja mišljenja o sadržaju. Dodao je da je problem što inicijativa nije dostavljena u pisanoj formi i da se Momčilo Novaković u telefonskom razgovoru izvinio zbog nedolaska na sjednicu. Tokom razgovora Novaković ga je obavijestio da je cilj njegove inicijative da za privremene delegacije koje imenuje Predstavnički dom PSBiH vrijedi ista obaveza kao i za stalne delegacije, tj. da se prije odlaska na neku destinaciju dogovore određene smjernice i stavovi o nastupu te delegacije, zavisno od toga gdje odlazi, te da se u tom smislu izmjeni Poslovnika Predstavničkog doma ili da se posredstvom Kolegija (pošto Kolegij imenuje privremene delegacije) izradi poslovnik o radu privremenih delegacija. Pitao je Komisiju da li će se o ovoj inicijativi raspravljati u odsustvu predlagača ili će se odgoditi rasprava.

Milorad Živković kazao je da je na dnevnom redu sjednice Doma druga inicijativa Momčila Novakovića u vezi s Predsjedništvom, te da bi i ova inicijativa, ako Komisija da mišljenje, postala obavezna tačka dnevnog reda.

Husein Nanić rekao je da ne vidi kako se može raspravljati o nečemu za šta nije dostavljen materijal, kako na sjednici Komisije, tako i na sjednici Doma, pa je predložio da se ova tačka skine s dnevnog reda.

Denis Bećirović predložio je da ova tačka ostane na dnevnom redu, da Komisija da mišljenje i da se na sjednici Doma usvoji zaključak kojim bi se određeno tijelo zadužilo da u određenom roku pripremi smjernice kako je Novaković predložio. Dodao je da u tom segmentu zaista ima problema koje bi trebalo riješiti.

Milorad Živković rekao je da on misli da se ova tačka može ostaviti u dnevnom redu Komisije danas i da Kolegij sutra to uvrsti i na sjednicu Doma. Dodao je da nije problem što nedostaje materijal, već je problem što nije dostavljen za raspravu, a u dostavljenom pismu konstatirano je da je o tome raspravljano, to je potvrđeno kao problem i sad bi trebalo na sjednici Doma reći kako to završiti.

Nakon rasprave predsjedavajući Slavko Matić konstatirao je da nema novih prijedloga za izmjene i dopune predloženog dnevnog reda, pa je za sjednicu jednoglasno usvojen sljedeći

DNEVNI RED

1. Usvajanje Zapisnika 66. sjednice Komisije;
2. Davanje mišljenja o saglasnosti za otkazivanje Evropske konvencije o zaštiti arheološke baštine, usvojene u Londonu, 6.5.1969. (resorno ministarstvo: Ministarstvo civilnih poslova BiH);
3. Davanje mišljenja o saglasnosti za ratificiranje:
 - a) Ugovora između Bosne i Hercegovine i Svete Stoline o dušebrižništvu katoličkih vjernika, pripadnika Oružanih snaga Bosne i Hercegovine (resorno ministarstvo: Ministarstvo odbrane BiH);
 - b) Sporazuma između Vijeća ministara Bosne i Hercegovine i Vlade Republike Francuske o saradnji u oblasti unutrašnje sigurnosti (resorno ministarstvo: Ministarstvo sigurnosti BiH);
 - c) Sporazuma o zajmu između Bosne i Hercegovine i Evropske banke za obnovu i razvoj – *Projekat plinifikacije Srednjobosanskog kantona* (resorno ministarstvo: Ministarstvo finansija i trezora BiH);
 - d) Protokola o vodi i zdravlju uz Konvenciju o zaštiti i korištenju prekograničnih vodotoka i međunarodnih jezera iz 1992. (resorno ministarstvo: Ministarstvo vanjske trgovine i ekonomskih odnosa BiH);
4. Rasprava o Inicijativi poslanika Momčila Novakovića “Prijedlog smjernica za djelovanje privremenih delegacija koje, u ime Bosne i Hercegovine, učestvuju na međunarodnim skupovima”;
5. Izvještaji i materijali pristigli Komisiji:
 - a) Informacija o usvajanju prijedloga Evropske komisije o bezviznom režimu za građane BiH i Albanije (materijal MVPBiH);
 - b) Izvještaj o posjeti delegacije Komisije za ostvarivanje ravnopravnosti spolova Republici Srbiji;
 - c) Vijeće Evrope (VE) – Sastanak Parlamentarne skupštine Vijeća Evrope, od 26. do 29.4.2010., Izvještaj s dijela sastanka vođenog po hitnom postupku: “Hitna potreba za ustavnim reformama u Bosni i Hercegovini”, 29.4.2010. (materijal MVPBiH);

- d) Pismo predsjednika Parlamenta Grčke Philipposa Pestalnikosa zamjeniku predsjedavajućeg Predstavničkog doma Parlamentarne skupštine BiH Miloradu Živkoviću;
 - e) Zabilješka sa sastanka gosp. Vinka Zorića s gđom Marie-Louisom Beck, predsjednicom Grupe prijateljstva s BiH u Bundestagu, 18.5.2010.;
 - f) Izvještaj s drugog dijela zasjedanja Parlamentarne skupštine Vijeća Evrope za 2010. godinu, Strasbourg, od 26. do 30.4.2010.;
6. Tekuća pitanja.

Ad.1. Usvajanje Zapisnika 66. sjednice Komisije za vanjske poslove

Zapisnik 66. sjednice usvojen je jednoglasno, bez primjedbi.

Ad.2. Davanje mišljenja o saglasnosti za otkazivanje Evropske konvencije o zaštiti arheološke baštine, usvojene u Londonu, 6.5.1969.

Predsjedavajući je rekao da je ovo neobičajena tačka dnevnog reda, jer vjerovatno prvi put dajemo mišljenje o nečemu što treba otkazati, a ne dati mišljenje o ratificiranju. Zamolio je predstavnika Ministarstva civilnih poslova BiH da podnese obrazloženje.

Majda Duranović iz Ministarstva civilnih poslova BiH kazala je da je Ministarstvo predložilo otkazivanje Evropske konvencije kako bi se stvorili preduslovi za pristupanje BiH jednoj revidiranoj konvenciji o zaštiti arheološke baštine iz 1992. godine, pa je predložilo da se prethodna konvencija stavi van snage.

Nije bilo pitanja i članovi Komisije jednoglasno su dali pozitivno mišljenje Predstavničkom domu u vezi s otkazivanjem Evropske konvencije o zaštiti arheološke baštine, usvojene u Londonu, 6.5.1969.

Ad.3.a) Davanje mišljenja o saglasnosti za ratificiranje Ugovora između Bosne i Hercegovine i Svete Stolice o dušebrižništvu katoličkih vjernika, pripadnika Oružanih snaga Bosne i Hercegovine

Muhamed Smajić iz Ministarstva odbrane BiH kazao je da je procedura o zaključivanju ovog ugovora realizirana u skladu sa Zakonom o zaključivanju međunarodnih ugovora. Predsjedništvo BiH donijelo je odluku o prihvatanju i ugovor je potpisan u aprilu. On je dodao da je ovo ugovor koji je već zaključen s druge dvije vjerske zajednice.

Denis Bećirović pitao je šta je s manjim vjerskim zajednicama.

Muhamed Smajić kazao je da su, u skladu s odlukama Predsjedništva BiH, zastupljeni i ostali te da će se, ako ih bude 2 %, i za njih osigurati pravo na ostvarivanje vjerskih sloboda. Prema sadašnjim pokazateljima, mi nemamo tih 2 % da bismo osigurali takve uslove, dodao je Muhamed Smajić.

Milorad Živković pitao je kako se došlo do tog procenta.

Muhamed Smajić kazao je da je to bilo u nadležnosti Predsjedništva BiH i da je to procenat koji je Predsjedništvo BiH odobrilo.

Denis Bećirović pitao je da li je u državama članicama NATO-a ovo regulirano na isti ili sličan način.

Muhamed Smajić odgovorio je da je upravo 2 % standard koji NATO primjenjuje. On je kazao da su u radu ove grupe Ministarstva odbrane BiH učestvovali i predstavnici Štaba NATO-a u Sarajevu i njihove službe iz Brisela koje su davale stručnu podršku, tako da su zadovoljeni standardi i kriteriji koji se odnose na ostvarivanje vjerskih prava i sloboda pripadnika Oružanih snaga BiH.

Nakon toga članovi Komisije jednoglasno su dali pozitivno mišljenje Predstavničkom domu u vezi s ratificiranjem ovog ugovora.

Ad.3.b) Davanje mišljenja o saglasnosti za ratificiranje Sporazuma između Vijeća ministara Bosne i Hercegovine i Vlade Republike Francuske o saradnji u oblasti unutrašnje sigurnosti

Obrazloženje u vezi s ovim sporazumom dao je Samir Rizvo iz Ministarstva sigurnosti BiH. Kazao je da u ovom sporazumu nema ništa neobično u odnosu na sporazume koje je Komisija ranije razmatrala, a koji se odnose na policijsku saradnju, borbu protiv svih vidova kriminala i terorizma. Riječ je o razmjeni podataka, zajedničkim aktivnostima, razmjeni znanja i iskustava i sl.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad.3.c) Davanje mišljenja o saglasnosti za ratificiranje Sporazuma o zajmu između Bosne i Hercegovine i Evropske banke za obnovu i razvoj – *Projekat plinifikacije Srednjobosanskog kantona*

Bejta Ramović, u ime Ministarstva finansija i trezora BiH, kazala je da je riječ o ugovoru o zajmu kojim se finansira 40 kilometara plinovoda u Srednjobosanskom kantonu koji uključuje Travnik, Novi Travnik, Busovaču i Vitez. Iznos zajma je 17 miliona eura. Uslovi zajma su uobičajeni EBRD uslovi, s rokom otplate od 15 godina, uključujući tri godine grejs perioda, kamata je euribor plus 1%, 0,5% su troškovi na nepovučena sredstva i 1% je menadžment, tj. troškovi upravljanja. Očekuje se da će projekat biti završen do septembra 2012. godine, a projekat će realizirati BH-Gas.

Predsjedavajući Matić pitao je da li ima naznaka da će ovakvi projekti biti pristupačni i realizirani na nekim drugim prostorima BiH.

Predstavnica Ministarstva kazala je da treba pokrenuti inicijativu prema Ministarstvu finansija i trezora, a Ministarstvo finansija će prema međunarodnim institucijama koje finansiraju ovakve projekte.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad.3.d) Davanje mišljenja o saglasnosti za ratificiranje Protokola o vodi i zdravlju uz Konvenciju o zaštiti i korištenju prekograničnih vodotoka i međunarodnih jezera iz 1992. godine

Brankica Pandurević, u ime Ministarstva vanjske trgovine i ekonomskih odnosa BiH, kazala je da je ovaj protokol predviđen uz Konvenciju o zaštiti i korištenju prekograničnih vodotoka, koja je donesena u Helsinkiju 1992. godine. Smisao je osigurati kvalitetnu vodu na nacionalnom, regionalnom i međunarodnom nivou radi zdravlja cjelokupnog društva. Napomenula je da je Helsinška konvencija ratificirana u septembru prošle godine i da je Ministarstvo provelo potrebnu proceduru u vezi s ovim protokolom.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog protokola.

Ad.4. Rasprava o Inicijativi poslanika Momčila Novakovića “Prijedlog smjernica za djelovanje privremenih delegacija koje, u ime Bosne i Hercegovine, učestvuju na međunarodnim skupovima”

Predsjedavajući Slavko Matić obavijestio je članove Komisije da se Momčilo Novaković izvinio zbog nedolaska na sjednicu Komisije jer je imao drugih obaveza. Rekao je da misli da je Novaković osnovu za ovu inicijativu našao u poslovnica stalnih delegacija i da jedna takva stavka postoji i u Poslovniku Delegacije PSBiH u Vijeću Evrope, prema kojoj je naša delegacija obavezna da, prije odlaska na zasjedanje Vijeća Evrope, održi sastanak radi zauzimanja određenih stavova. Dodao je da je zajednički stav vrlo širok pojam kad se zna da članovi Delegacije PSBiH u Vijeću Evrope imaju pravo djelovati kao članovi Parlamentarne skupštine Vijeća Evrope i da ih tu nikakvi zajednički stavovi ne mogu ograničavati ni usmjeravati. Ideja Novakovića je da jedna takva odredba bude ugrađena u poslovnik privremenih delegacija ili je aludirao i na Poslovnik Predstavničkog doma, u dijelu u kojem se govori o imenovanju delegacija, radi ugrađivanja odredbe o potrebi održavanja sastanaka prije odlaska na međunarodne skupove. Podsjetio je na stavove Bećirovića i Živkovića iznesene u raspravi o prijedlogu dnevnog reda i otvorio raspravu.

Milorad Živković iznio je prijedlog da Komisija predloži Domu dva zaključka. Prvi je **da Zajednički kolegij izradi prijedlog izmjene Poslovnika prema kojem bi se ponašale privremene zajedničke delegacije. Drugi zaključak je da zajedničke delegacije, do donošenja tog akta, moraju održati zajedničku sjednicu kako bi se dogovorile o nastupu kada je riječ o potpisivanju određenog akta.**

Milorad Živković naglasio je da bi se to odnosilo na situacije kada se potpisuje neki dokument koji je na dnevnom redu skupa, a ne na iznošenje mišljenja na skupovima ili konferencijama.

Husein Nanić kazao je da podržava nastojanje za iznalaženje rješenja u vezi s radom privremenih delegacija, ali je u dilemi da li Komisija treba iznijeti svoj prijedlog kako se o ovome ne bi otvorila bespotrebna rasprava na sjednici Doma. Saglasio se s prijedlogom Milorada Živkovića, ali je pitao da li zaključak treba biti kao stav Komisije.

S obzirom da predlagač inicijative nije bio prisutan sjednici Komisije, Komisija je zauzela stav da Domu ne upućuje prijedlog zaključka, već da Komisija daje pozitivno mišljenje o inicijativi i o potrebi rasprave na sjednici Doma s ciljem rješavanja pitanja rada

privremenih delegacija, pri čemu predsjedavajući Komisije prilikom obrazlaganja Mišljenja može iznijeti u raspravi predloženi zaključak.

Ad.5. Izvještaji i materijali pristigli Komisiji:

- a) Informacija o usvajanju prijedloga Evropske komisije o bezviznom režimu za građane BiH i Albanije (materijal MVPBiH);
- b) Izvještaj o posjeti delegacije Komisije za ostvarivanje ravnopravnosti spolova Republici Srbiji;
- c) Vijeće Evrope (VE) – Sastanak Parlamentarne skupštine Vijeća Evrope, od 26. do 29.4.2010., Izvještaj s dijela sastanka vođenog po hitnom postupku: “Hitna potreba za ustavnim reformama u Bosni i Hercegovini”, 29.4.2010. (materijal MVPBiH);
- d) Pismo predsjednika Parlamenta Grčke Philipposa Pestalnikosa zamjeniku predsjedavajućeg Predstavničkog doma Parlamentarne skupštine BiH Miloradu Živkoviću;
- e) Zabilješka sa sastanka gosp. Vinka Zorića s gđom Marie-Louisom Beck, predsjednicom Grupe prijateljstva s BiH u Bundestagu, 18.5.2010. godine;
- f) Izvještaj s drugog dijela zasjedanja Parlamentarne skupštine Vijeća Evrope za 2010. godinu, Strasbourg, od 26. do 30.4.2010.;

Predsjedavajući je konstatirao da je Komisija primila k znanju pristigle izvještaje i materijale.

Predsjedavajući Matić konstatirao je da nema materijala pod tačkom “Tekuća pitanja” i zaključio sjednicu.

Sjednica je završena u 14.45 sati.

SEKRETAR KOMISIJE

Merdžana Iglica

PREDSJEDAVAJUĆI KOMISIJE

Slavko Matić

Dostavljeno:

- naslovu
- a/a